

## **PRIJEDLOG**

Na osnovu člana 27. stav 7. Zakona o budžetima u Federaciji BiH („Službene novine Federacije BiH“, br. 102/13, 9/14, 13/14, 8/15, 91/15, 102/15 i 104/16), a u vezi sa članom 53. stav 2. Zakona o zdravstvenoj zaštiti („Službene novine Federacije BiH“, br. 46/10 i 75/13) Zastupnički dom Parlamenta Federacije Bosne i Hercegovine, na..... sjednici održanoj ..... 2017.godine i Dom naroda Parlamenta Federacije Bosne i Hercegovine na ..... sjednici održanoj ..... 2017. godine, d o n i o j e

### **O D L U K U O DAVANJU SAGLASNOSTI NA REBALANS FINANSIJSKOG PLANA ZAVODA ZA TRANSFUZIJSKU MEDICINU FEDERACIJE BOSNE I HERCEGOVINE ZA 2017.GODINU**

#### **I**

Ovom Odlukom daje se saglasnost na Rebalans Finansijskog plana Zavoda za transfuzijsku medicinu Federacije Bosne i Hercegovine za 2017. godinu.

#### **II**

Rebalans Finansijskog plana iz tačke I nalazi se u prilogu ove odluke i čini njen sastavni dio.

#### **III**

Ova odluka stupa na snagu narednog dana od dana objavljivanja u „Službenim novinama Federacije BiH“.

Broj: .....

Datum: .....

Predsjedavajuća  
Doma naroda  
Parlamenta Federacije BiH

Predsjedavajući  
Predstavničkog doma  
Parlamenta Federacije BiH

## **OBRAZLOŽENJE**

### **Odluke o davanju saglasnosti na Rebalans Finansijskog plana Zavoda za transfuzijsku medicinu Federacije Bosne i Hercegovine za 2017.godinu**

#### **ZAKONSKI OSNOV**

Zakonski osnov za donošenje ove odluke sadržan je u članu 27. stav 7. Zakona o budžetima u Federaciji BiH („Službene novine Federacije BiH“, br. 102/13, 9/14, 13/14, 8/15, 91/15, 102/15 i 104/16 ), a u vezi sa članom 53. stav 2. Zakona o zdravstvenoj zaštiti („Službene novine Federacije BiH“, br. 46/10 i 75/13).

#### **RAZLOZI ZA DONOŠENJE**

Na osnovu odredbi člana 27. Zakona o budžetima u Federaciji Bosne i Hercegovine („Službene novine Federacije BiH“, br. 102/13, 9/14, 13/14, 8/15, 91/15, 102/15 i 104/16 ) Zavod za transfuzijsku medicinu Federacije Bosne i Hercegovine izradio je Finansijski plan za 2017. godinu, koji se putem Federalnog ministarstva zdravstva dostavlja Vladi Federacije Bosne i Hercegovine na razmatranje, a Vlada Federacije Parlamentu Federacije BiH na razmatranje i davanje saglasnosti. Slijedom toga, i izmjene, tj. rebalans Finansijskog plana podliježe istovjetnoj proceduri.

Bitno je istaći da je Upravni odbor Zavoda za transfuzijsku medicinu Federacije Bosne i Hercegovine razmatrao i usvojio Rebalans Finansijskog plana Zavoda za transfuzijsku medicinu Federacije Bosne i Hercegovine.

Također, treba ukazati da je članom 53. stav 2. Zakona o zdravstvenoj zaštiti propisano da je Federacija Bosne i Hercegovine osnivač zavoda iz člana 43. stav 1. istoga Zakona, a što se odnosi i na Zavod za transfuzijsku medicinu Federacije BiH. Radi se o ustanovi koja obavlja transfuzijsku djelatnost, što podrazumijeva obavljanje stručnih i naučno-istraživačkih zdravstvenih funkcija iz okvira prava i dužnosti Federacije Bosne i Hercegovine. Imajući to u vidu, Zavod za transfuzijsku medicinu Federacije BiH odgovara za svoj rad i poslovanje osnivaču, tj. Federaciji Bosne i Hercegovine, te u okviru svojih obaveza prema osnivaču dostavlja na saglasnost Finansijski plan za svaku kalendarsku godinu, uključujući i Rebalans Finansijskog plana. U svezi s tim, mora se istaći da Zavod za transfuzijsku medicinu Federacije BiH nije vanbudžetski korisnik, u smislu člana 27. Zakona o budžetima u Federaciji Bosne i Hercegovine, već se finansira iz više različitih izvora sredstava, međutim, radi osiguranja transparentnosti u planiranju i radu, Zavod shodno primjenjuje odredbe Zakona o budžetima u Federaciji Bosne i Hercegovine. Navedenim postupanjem Zavod osigurava da osnivač može blagovremeno da prati Finansijski plan, kao i Rebalans Finansijskog plana, te izvršenje istog. Zbog navedenog, i Rebalans Finansijskog plana dostavljen je Federalnom ministarstvu zdravstva na dalje upućivanje Vladi Federacije BiH i Parlamentu Federacije BiH.

Kada je riječ o Rebalansu Finansijskog plana Zavoda, Zavod ističe da je Finansijski plan za 2017. godinu rađen u septembru 2016. godinu i prihodi su planirani na osnovu potpisanih ugovora o finansiranju pruženih usluga osiguranicima Kantona Sarajevo sa Zavodom zdravstvenog osiguranja Kantona Sarajevo (ZZO KS) i za pružanje usluga pacijentima po vertikalnom programu finansiranja sa Zavodom zdravstvenog osiguranja i reosiguranja Federacije BiH (ZZOR FBiH) za 2016. godinu. Ovi ugovori su potpisani za 2017.godinu u veljači 2017. godine i planirani prihodi po

ovim ugovorima se veoma razlikuju u odnosu na prethodnu godinu, tako da je ZZO KS za 2017. god. planirao da smanji finansiranje testova na transmisione bolesti za 100.000 KM, a odobri direktno finansiranje troškova NAT metodom testiranja krvi čime bi se ispoštovale odredbe Pravilnika o osiguranju kvaliteta krvi i krvnih pripravaka, u dijelu obaveznog testiranja na *HCV core antigen hepatitis C*, u iznosu od 600.000 KM. Zavod zdravstvenog osiguranja i reosiguranja Federacije BiH je također umanjio finansiranje usluga po vertikalnom programu finansiranja za 85.000 KM. Nadalje, Zavod zdravstvenog osiguranja Kantona Sarajevo nije uplatio do 31.12.2016. godinu tranšu za 12/2016. god., kao i dio zahtjeva za direktno finansirane troškove koji se odnose na 2016. god. Uplate su izvršene u siječnju 2017.godine i s obzirom na modificiranu aktuelnu osnovu priznate su kao prihod u 2017. godini. Sve navedeno je prouzrokovalo potrebu izrade Rebalansa Finansijskog plana, a na koji saglasnost treba da dā Parlament Federacije BiH.

## **OBRAZLOŽENJE**

Tačkom I Odluke daje se saglasnost na Rebalans Finansijskog plana Zavoda za transfuzijsku medicinu Federacije Bosne i Hercegovine za 2017. godinu.

Tačkom II Odluke definirano je da je Rebalans Finansijskog plana iz tačke I sastavni dio ove Odluke i da se nalazi u prilogu.

Tačkom III Odluke predviđeno je da ista stupa na snagu narednog dana od dana objavljivanja u „Službenim novinama Federacije BiH“.

## **FINANSIJSKA SREDSTVA**

Za realizaciju ove odluke nisu potrebna dodatna izdvajanja sredstava iz Budžeta Federacije BiH.